

Ewangelicznie za św. Łukaszem

Łk 2,1-14

Kej Cezar August zadekretował
We cołkim państwie register stował
Ludziom trza było sie dać zrachować
Kaj kto rodzōny tam za tym stawać
Wielu na wander bestōż wybrało
Tako we Syrii tyż sztimowało.

Kwiryn w prowincji namiystnikował
Stało sie tako jak Cezar kozoł
Jōzef co miyszkoł we Nazarycie
Tyż musioł ruszyć, pewno to wycie
Tōż chnetko za nim ta Galileja
Jako przywito syna Judeja?

Jōzef z Dawiada dyć pokolynia
Mu betlejymsko szkryfniōno ziymia
Tam ze Maryjōm ślubnōm keruje
Miasto kaj rodiōł tym uraduje?


Fest przy nadzieji Maryja była
Wander jyj cinyżkim, tego niy kryja
W Betlejem prziszło jyj rozwiōnzanie
W stajnce lichey, tako dyć stanie
Placu w gospodzie im brakowało
W stajnce lichey wszystko sie stało.

Tam urodziła piyrworodnego
Tam dała światu Syna Bożego
W pieluchy Jego tam ôwinyła
W żłobie gowiedzi Go położyła
Zbawicielowi żłob stoł sie lyżym
Bestōż co ziymske tako mu bliżyj.

Pastyrze wele dyć wachowali
Gowydź cuzamyn w stadzie trzymali
Nogle janiōła Pańskiego widzōm
Blaskym strachajōm, tym trefym biydzōm
Łōn sfurnōł do nich prawie z wieściami
We kerych radość, wycie już sami.

Pedzioł im: Wcale sie niy lynkejcie
Radować trzeba, tymu dziwejcie
Radujcie - dzisioj w rodzie Dawida
Zbawiciel znoloz, skōńczy sie biyda
Krystus Pan prawie już na tym świecie
Idźcie tam kaj Go wartko znojdziecie.

Idźcie, Dzieciōntko we żłobie leży
W pieluszkach tako, musicie wierzyć
Yno na sianie, w lichey stajnce
Dyć zdo świat cołki we Jego rynce
Syn Boga tako richtig narodziōł
W Betlejem prawie, Bōg na to godziōł.



Naroz ze nieba sfurgły janioły
Wiele ich było, śpiyw ich wesoły
Dało sie słychać - chwolyły Boga
Jako? Wōm szkryfnōńc terozki moga:
Niyh Bogu chwała na wyskości!
Na ziyimi pokōj niych ciyngym gości!

Chwała Dzieciōntku, Zbawicielowi
Chwała i Bogu, i Krystusowi
Pokōj kaj ludzie sōm dobry woli
Pokōj kaj czowiek Boga durś chwoli.

Kej już janioły kajś pofurgały
Pastyrzōw nogi tako zabrały
Drap do Betlejym - ôboczyć chcieli
Kaj Dzieciōnteczku Maryja ścieli
Co z woli Boga, ô czym janioły
Im ôznojmiały co Jymu pszoły.